



## Et spokkt om Beekerhoff

En wohre Bejebenhe-it von Peter Hamacher,  
mönkesmoht vertällt von Hubert Perpéet

Et wohr en de adtziger Johre en Lengtörp te doll on te doll — et spokkden üwerall. Mr konnt sech bold nit mieh als chrestleche Mensch am Owend för de Dühr tro-ue. An Bör-gesch flohren de Blottsche dorch de Loft, am Kerkhoff driew sech jiede Neiht e Jespenz erömm, dat, wenn dr Wenk dorch de Bö-im stri-ek, e-isig Hui-hui-hu ri-ep. Am Kothe rutschden am helle Dagg de Panne vom Dahk — on op e Hoor wör dr Jörgel Maikamp, de jrad mem Honges-wahre vörbe-i trock, op dr Duht von dänn Schärvele jetroffe wohde.

Am schlemmste jing et om Beekerhoff to-u. Dr Beekerbur wor verdahl ne kuraschierte Mann — äwwer et wuht em op de Duhr doch e besske he-iht on verfiet: Jiede Owend jing de Ste-inohligslamp, die owe am Backes hing, te schidder. Te senn wor Nömmes. Et jing nit met reihte Denge to-u. Mr konnt noch su juht obpasse, mr konnt sech drongerstelle, en de Loft jahpe on luhre — mett enns jing et kapafisch, on de Jlasschervele tervelden op de Ehd.

No nr Tiet jing dr Beekerbur owend för owend met dämm Vörderlahder om Buckel on de Lö-it en dr Hank üwer dr Hoff on dorch de Ställ. On jiehdes mohl jing öm de Lö-it en dr Hank kapott. He schoot dann sinn Jewehr aff, dat de Fleedermühs opjeschreckt dorch de Loft sausden on de Hönner op dr Hönnerhuht ahnfinge, te jackele. Dat Jespenz lieht sech äwwer von dämm Trömölt nit afschrecke — jiehde Owend makken et sech bemerkbar. De Meihde woll-den nit mieh, wenn et düster wor, en dr Stall. Dat Vieh wuht nit mieh reiht

versorgt — on kee Wonger: De Küh jowen immer wänniger Melk on de Botter wollt nit mieh reiht ki-ene. De Burschaft jing immer mieh trück. Dr Levie von Ratinge wollt nix mieh vör et Vieh betahle. Küh, die verhext wöhre, könnt he nit verkongele. Dr Bur wor ganz verdrießled. Dat wohr jeweiß on wahrhaftig: suh konnt dat nit mieh widder jonn.

Do kohm öm en dr Senn, dat he be-i de 39er en Düsseldorf ne Hauptmann kannden, de dökkes met öm op dr Jagd jewehse wor. En sinner Nuht lieht he ömm bestelle, he mäuht mol no Lengtörp kuhme. De lieht sech nit lang nühdige, woß he doch, dat mr be-im Beekerbur juht opjehowe wor.

Wie dr Beekerbur dämm Hauptmann sinne Öchel vertellden, lachden de, on versprook, e Stöck of twentig Sol-date op dr Hoff te leje, öm dämm Spuhk e Äng te mahke. Wie et afjemakkt wohr, su wuht et jedonn. Von där Tieht ahn wor von dämm Jespänz nit te spühre mieh. Am me-iste Spaß hadden de Meihde — se wohren jezz nit mieh ut em Stall te schlahre. On och de Kommisjonges woren met ürem Loos tefri-ede. Om Beekerkoff wor et schönnder, wie op dr Jolzhe-imer He-id; he-i jov et juht Ehte on Drenke, on op dr Jolzhe-imer He-id wuhden die Jonges schwor jebimmst.

No e paar Wehke trocken die Sol-date widder af. Äwwer jihde Sonntag kohm dr Onteroffizier nom Trinke vom Beekerhoff. On wie die Twei jehierot hadden, on op e Johr ne kle-ine 39er ahnkohm, wut dr Beekerbur Pattöhm op dr Do-up.

(Aus Quecke Nr. 9 – April 1952)